

DBKL tutup kedai sirih, ikan, runcit milik warga asing

Kuala Lumpur: Kedai menjual sirih, ikan serta runcit antara tujuh premis perniagaan milik warga asing yang ditutup Dewan Bandaraya Kuala Lumpur (DBKL) pada operasi, kelmarin.

Tujuh premis terbabit terletak di sekitar Jalan Gombak, Jalan Jernai, Jalan Cheras Baru, Taman Sri Rampai dan Taman Maluri di sini.

DBKL pada kenyataan semalam berkata, operasi dijalankan Jabatan Penguatkuasaan hasil maklumat awam dan risikan.

"Kami memeriksa 15 premis perniagaan termasuk pasar mini, kafe, kedai barangan elektrik serta perabot.


"Premis terbabit ditutup mengikut Seksyen 101(1)(v) Akta Kerajaan Tempatan 1976. Kami turut mengenakan tiga tindakan sitaan terhadap barangan jualan warga asing," katanya.

DBKL turut mengeluarkan 11 kompaun.

"Semua peralatan dan barangan perniagaan disita dipindahkan ke Setor Sitaan DBKL di Jalan Lombong, Taman Miharja di sini.

"Pemilik premis perniagaan diingatkan supaya mematuhi peraturan dan undang-undang ditetapkan DBKL.

"Tindakan penguatkuasaan sentiasa dilaksanakan dari semasa ke semasa mengikut Parlimen di Kuala Lumpur," katanya.



PENGUATKUASA DBKL menutup premis perniagaan warga asing di Jalan Gombak, Jalan Jernai, Jalan Cheras Baru, Taman Sri Rampai dan Taman Maluri, pada 22 Ogos lalu.